

左恪靖侯奏稿續編

恪靖奏稿續編卷十四目錄

開復處分謝

恩摺

搜捕逸賊並劉松山等請獎摺

補陳劉松山等獲勝詳細情形片

請收回

成命摺

覆陳善後事宜摺

料理西征並遵

旨陛見摺

奏劉松山剿賊出力並曾國藩知人之明片

恭謝

天恩摺

分別撤留吉林黑龍江兵勇摺

軍機大臣 字寄同治七年七月初二日奉

上諭李鴻章奏連日督軍追剿屢獲大捷西捻全股蕩
平並飭各軍查明張總愚下落各摺片覽奏實深欣慰
本日已明降諭旨宣示並將李鴻章等先予恩施矣各
路官軍進剿張逆在鹽山滄州及德平博李清平等處
迭獲大捷逆目次第乞降大股賊匪全數擒斬惟逆首
張總愚是否擊斃抑係淹死未據查明著李鴻章等督
飭各軍嚴密搜尋該逆無論死是生總須訪查確實
無令渠魁漏網該逆之姪張正江亦尙無下落著一併

查明具奏並著都興阿左宗棠李鴻章英翰丁寶楨飭令該將領乘此聲威搜捕餘匪務絕根株運河等處官軍團練並著都興阿左宗棠李鴻章官文崇厚英翰丁寶楨等責令各該兵團加意嚴防認真守禦且張總愚屢圖鳧水偷渡以求倖脫尤不可稍涉大意各營迭次收降甚眾該大臣督撫等當妥籌善策分別遣散並令將馬匹器械一律呈繳現在兵勇尙難遽撤至將來遣撤之時尤當分起撤回妥爲辦理斷不可吝惜小費就近在直東遣散以致滋生事端陳國瑞所收降人僞淮

王邱元才諒卽邱遠才卽著都興阿飭令該侍衛派隊將邱元才及該降眾送至英翰軍營交該署撫妥爲鈐束正在寄諭間據英翰馳奏各軍逼賊於徒駭河大獲全勝首逆張總愚投水伏誅逆屍尙未尋獲等語仍著李鴻章等檄飭各軍會同搜捕務得確情是爲至要將此由六百里各諭令知之欽此

開復處分謝

恩摺

奏爲恭謝

天恩仰乞

聖鑒事竊臣於七月初五日承准神機營行知七月初

二日內閣奉

上諭本日據李鴻章英翰由六百里加緊馳奏官軍會剿捻逆全股蕩平大概情形各一摺覽奏深爲欣慰左宗棠縱賊出陝追剿尙屬迅速抵直隸後督軍截擊扼守運防亦頗嚴密著將該大臣迭次降革處分一併先

行開復欽此跪讀之下慙感難名當卽恭設香案望

闕叩頭恭謝

天恩伏念

微臣

軍符忝綰韜略未嫻屬秦隴之多艱兩

支巨寇忽并汾之告警遽失前禽載罪星馳瞻

畿郊而每懷靡及總師月捷歷瀛鄭而載賦同仇方憂

巨憝稽誅捫心難以自釋詎冀

殊恩曾被折首共慶有嘉吉語遙傳人天懽喜

慈厯用慰瑕類蠲除重蒙

覆幬之施東歸猶懷載荷

生成之德西節仍持片惟有盡瘁馳驅不遑燕息殫誠
規畫用答

鴻施期明節制於

三驅冀協師中於九伐所有感激下忱謹具摺叩謝
天恩伏乞

皇太后

皇上聖鑒訓示謹

奏
同治七年七月十一日

同治七年七月初十日內閣奉

上諭本日據李鴻章由六百里加緊馳奏剿辦捻逆全股蕩平地方一律肅清並查明首逆張總愚投水淹斃一摺覽奏之餘寔深嘉悅捻逆自倡亂東南十有餘年竄擾數省生民受其荼毒神人共憤罪惡貫盈上年派李鴻章爲欽差大臣剿除任柱賴汶沆等股匪本年正月間逆匪張總愚復糾合匪眾肆擾山西河南直隸窺伺畿疆經官文英翰丁寶楨李鶴年督兵防剿並經左宗棠統軍追擊剿逆復調李鴻章赴直東一帶督剿以

收眾志成城之效現經李鴻章會同各軍督率各將領
蕩平捻逆並將餘匪搜捕淨盡具見該大臣督撫等協
力同心膚公克奏前已賞還李鴻章雙眼花翎騎都尉
世職黃馬褂並開復處分及左宗棠等降革處分均予
開復自應分別再沛恩施以昭懋賞李鴻章著賞加太
子太保銜並以湖廣總督協辦大學士左宗棠著賞加
太子太保銜並交部照一等軍功議敘丁寶楨英翰均
著賞加太子少保銜並交部照一等軍功議敘李鶴年
著賞戴花翎並交部照一等軍功議敘崇厚當捻逆攻

撲天津時督率兵勇紳團力保郡城並籌濟各營糧石
餉需源源不絕寔屬著有勞績崇厚著賞加太子少保
銜頭品頂戴並賞戴雙眼花翎兩江總督曾國藩籌辦
淮軍後路糧餉軍火俾李鴻章等克竟全功著交部從
優議敘署直隸總督大學士官文前在湖廣總督任內
暨本年擒匪竄直時均因會剿不力疊經降旨懲處此
次擒股悉平著加恩間復太子太保銜暨勦擒不力革
職留任處分並賞還雙眼花翎以示錫爵酬庸用彰慶
賞至意欽此

搜捕逸賊並劉松山等請獎摺

奏爲馬步各軍因搜捕逸賊尙未收隊現在辦理情形
謹據寔馳陳仰祈

聖鑒事竊劉松山郭運昌富珠哩納蘇肯等於前月二十
十日二十一日續獲大勝賊勢極蹙情形臣於二十六
日馳報嗣據劉松山等呈稱二十八日追賊至山東高
唐州南之張村遇劉銘傳所部馬隊聞賊已悉數擒斬
乃引軍北還初一夜抵甯津營次沿途收獲甫經薙髮
之老賊金本立據供二十七日張總愚經官軍衝斷後

與賊目張正祥王老貫率餘黨逃逸初二日劉松山將
金本利解至臣營臣親加訊究所供逆首竄逸餘黨尙
多情形雖未足盡信然其時張總愚既無確寔下落自
應盡力搜捕比卽飭劉松山等挑選馬步各隊及臣軍
分駐大柳梁家集之馬隊分道前進劉松山等並挑降
人騎馬隨行初三夜四鼓分向東北慶雲鹽山各路排
搜而南至初八日因所攜乾糧告罄暫回甯津據報沿
途搜捕未見賊踪而居民傳說各異有言賊甫竄過者
有言賊在某處者有言賊止零星數十騎或十數騎經

過未停者有言賊騎尙餘數百薙髮買糧假充官兵者
迫經督隊掩捕則蹤跡杳如彌望秣叢徒勞踣緝疊次
欽奉

諭旨務得逆首確寔下落而臣處所聞既有異詞搜尋
又無寔據若遽以空詞入

告正恐有心立異無以仰慰

慈厯如其附和隨聲寔覺言匪由衷捫心何能自釋此
微臣未敢及早馳報之寔情也初三日曾將賊供張逆
逃逸情形緘告李鴻章初八日接李鴻章鈔送二十九

日拜發全股蕩平大概情形摺片稿知張總愚尙無確
寔下落摺內所敘張正江逃至南鎮遇駱國忠兩軍堵
住拏獲極多並未明言擒斬臣意張正江或卽賊供在
逃之張正祥比卽刊發捕獲張總愚張正祥王老貫賞
格仍飭劉松山等挑選馬步各軍分途搜捕一面移行
運河西岸水路各軍暫緩撤防以昭慎密現在尙未收
隊頃奉初十日

諭旨李鴻章奏查明逆首投水淹斃得有降賊確供各
軍搜捕餘匪淨盡直東一律肅清是張逆寔已淹斃縱

張正祥王老賁暫稽顯戮亦可徐圖弋獲不致別釀事
端計劉松山等派隊海捕又逾五日如得實在消息亦
必稟詢進止臣自當酌度示知免致枉勞兵力也至事
後最宜慎者處置降人一節臣軍所收降眾先後共計
七千餘除被擄孩童籍隸本地者約千餘名當經各軍
遣散外其已經族屬認領者數百名此外籍隸山西陝
西及河北三府爲臣軍歸途所必經者約四五百名擬
安插各哨隨同行走就地資遣同籍其疲乏病弱者約
不過數百名遣之無虞惟其中壯健兇悍者不下四千

現經劉松山郭運昌挑留數百隨同搜捕餘均在甯津
營次此輩野性難馴防之不可疎而操之不可殘臣擬
以軍令鈐束挈歸陝西隨時斟酌辦理大約收降之要
在嚴禁搜奪財物及無故欺凌侮辱以導引善機銷其
悍戾之氣而察其狂悖險鷲干犯軍令者鋤而去之庶
可安反側而潛弭異患此次所收降人內有逆首陳玉
成張樂行餘黨江南髮逆兩淮捻逆遺種頗多非辦理
寬猛協宜緩急中節斷難期其弭首降心胥就軌度其
效固難期之於一時而一切機權操縱之說非所尙也

其善後各節容卽具摺陳明至劉松山郭寶昌兩軍喜
昌所部馬隊欽奉

恩旨飭_臣迅速查明奏請

優獎現在諸軍分道搜捕尙未收隊回營核辦尙須時
日惟前月十六七及二十二十一等日該各軍克獲大
捷當時曾各具稟開單請隨摺保獎_臣以蒞事在卽勗
其共竟全功同膺

懋賞不必先懇

恩施以明勞在人前功居人後之義各將士等亦均感

奮思報馳驅效命未敢少休茲奉

恩諭臣謹一面宣播

皇仁傳示各軍聊慰其希

恩望

澤之意一面將劉松山等前次所開隨摺請

獎各員核明開單先懇

天恩獎勵用昭激勸至劉松山郭寶昌郭運昌喜昌勞

績卓越久邀

聖明洞鑒而劉松山忠誠素著謀勇兼資爲各軍所推

許眾論僉同驗之功蹟均堪覆按臣處茲獲生賊以賊中所憚首推老湘卽恩承李鴻章獲訊賊供亦大略如是而其尤異者就撫諸賊無不願投劉松山軍營卽積年老賊如邱元才亦先擬投劉松山遣頭目洪順林繞道乞降中途乃爲陳國瑞收錄是其明證也廣東陸路提督達桑阿巴圖魯

賞戴花翎劉松山官職已崇在事最久應如何破格加恩優獎之處非臣下所敢妄擬伏候

聖裁提督銜安徽壽春鎮總兵法凌阿巴圖魯

賞戴花翎郭寶昌現已傷愈由河南起程前來尙未到
營應請以提督記名遇缺請

旨簡放其應如何再加

恩優獎之處出自

天恩記名總兵銓僧額巴圖魯郭運昌應請

旨加提督銜遇有總兵缺出儘先題奏請

旨簡放記名副都統吉林滿洲鑲紅旗協領喜昌請

賞加勇號並開吉林滿洲鑲紅旗底缺聽候

簡用如蒙

俯允喜昌所開協領缺應由軍營遴補現有頭品頂戴
記名遇缺儘先奏補副都統效勇巴圖魯富珠哩樸誠
銳勇久著勞績堪以先行拔補應請

旨遵行其各軍勞績卓著員弁容臣核明彙奏保獎以
彰戰績而勵戎行所有各軍連日搜捕現在辦理情形
及遵

旨保獎人員並繕清單附

奏伏候

皇太后

皇上聖鑒訓示施行謹

奏
同治七年七月十四日

補陳劉松山等獲勝詳細情形摺

再劉松山等軍六月十七日由吳橋甯津追賊獲勝賊
目湯松茂率眾乞撫業經臣於二十六日將大概情形
馳報續於二十八日接劉松山郭寶昌富珠哩訥蘇肯
等稟報始悉是日大捷詳細情形據稱十六日吳橋甯
津獲勝後探悉賊在西南距營約四十里劉松山等四
更出隊行數里遇馬賊數人送信來營賊目湯松茂率

眾二千餘人特來乞降另有賊目周世遠魯成信張鳳儀焦長林等共率眾千餘亦來乞撫均相隔不遠劉松山派弁往探旋據探弁帶湯松茂到營據稱帶眾投營因張總愚知覺追散數百現有一千四五百人軍械已毀特來投誠等語劉松山受之卽令各歸各隊派員帶隨隊伍之後復進十餘里申刻抵德州屬之汴梁鎮遇賊由南向北而來劉松山等隨卽列隊劉松山所部由中右兩路進郭運昌所部由左路進富珠哩訥蘇肯馬隊與老湘卓勝馬隊張兩翼以進該逆不料官軍突至

倉皇列隊餘賊紛紛亂竄我軍奮力猛進鎗礮齊施刀矛並舉斃賊甚多賊勢不支悉向東南奔竄我軍追殺五六里張總愚復率悍賊拚命衝撲又經官軍奮力衝殺賊敵不住仍向東南敗竄我軍又追十餘里至馬家莊時已一鼓遂收隊駐宿是役共計斃賊七八百名生擒三百餘名內有頭目宋五元程秉清蘇春喜許連珍等多名均訊明正法解散難民甚多奪騾馬千餘匹馬隊營官提督余虎恩受兩傷甚重其餘弁勇亦有傷亡內副將蘇正遠守脩沈有貴力戰陣亡應請

旨敕部從優議卹所有六月十七日劉松山等大獲勝捷詳細情形附片補陳伏乞

聖鑒謹

奏

同治七年七月十四日

同治七年七月十七日內閣奉

上諭左宗棠奏查明劉松山等軍迭次剿擒出力各員弁開單懇請獎勵一摺提督劉松山郭寶昌兩軍上年冬間由陝入晉跟蹤剿擒迭著勤勞本年復會合李鴻章派出各軍力籌兜剿俾逆逆全股肅清洵屬著有勞

續自應量予獎敘提督劉松山著賞穿黃馬褂並賞給三等輕車都尉世職郭寶昌著賞還黃馬褂交軍機處記名遇有提督缺出請旨簡放並賞給騎都尉世職郭運昌著賞給提督銜遇有總兵缺出請旨簡放喜昌著賞頭品頂戴卽開協領底缺富珠哩著補授吉林滿洲廂紅旗協領其餘單開之提督易德麟等兩員著交部照一等軍功例從優議敘總兵革合才等十四員均著交部從優議敘提督熊隆名著換瑚松額巴圖魯名號周國勝著賞換博奇巴圖魯名號喻執益著賞換綢武

巴圖魯名號楊見山著賞換西林巴圖魯名號周雲祥
著賞換剛安巴圖魯名號潘運璋著賞換達春巴圖魯
名號蘇大德著賞換呼敦巴圖魯名號洪必勝著賞換
法克精阿巴圖魯名號總兵李占椿著賞換奇車博巴
圖魯名號提督許得龍等三員均著賞給正一品封典
總兵熊有常等四員均著交軍機處記名遇有提督缺
出請旨簡放總兵王鳳鳴等三員均著以提督交軍機
處記名請旨簡放副將方廷芳等五員均著以總兵交
軍機處記名請旨簡放郭占榮著賞加總兵銜參將李

華文著以副將補用並賞加總兵銜馮殿英等三員均著以副將儘先推補內張懷玉並賞加總兵銜佐領訥蘇肯著以協領卽補德凌阿等二員均著以副都統請旨記名簡放佐領明慶著賞加二品銜委營總德明等二員均著以佐領卽補先換頂戴以示優獎該部知道
欽此

請收回 成命摺

奏爲叩懇

天恩收回成命事竊臣於七月十七日連鎮行營准

兵部火票遞到七月初十日內閣奉

上諭本日據李鴻章由六百里加緊馳奏剿辦捻匪全
股蕩平地方一律肅清並查明首逆張總愚投水淹斃
一摺覽奏之餘實深嘉悅左宗棠著賞加太子太保銜
並交部照一等軍功議叙欽此跪讀再三感激涕零罔
知攸措伏思逆捻乘冰橋過晉臣疏於籌慮咎無可辭

追賊直豫之交未能早日蕆事追賊竄山東直窺津沽
臣且防且剿又未能依限滅賊雖劉松山等馬步各軍
盡力追剿捷狀頻聞而臣之調度無方已可概見緣頻
年南北奔馳精力銷耗前在浙江軍營病後失調致患
殄泄纏延至今不愈雖須髮如舊而神明已衰左手足
前患筋惕肉瞤諸證近復加足背浮腫艱於乘騎故移
營連鎖以來僅止親身出隊一次智慮不如從前筋力
亦近頽廢臣亦未嘗不以此自恨也本擬事平後以衰
病自陳懇

恩罷斥而西事方殷未敢遽爲退休之請非但受

恩過重於心有所不安抑且所事無成於義有所不可
蒙慈復殊恩優習官銜議敘一等前功既無可言後效
更不可必若復不自忖量居然忝竊正恐無以服將士
之心雖

天恩高厚不難曲示優容而微臣清夜自思能無愧怍
合無仰懇

聖慈俯鑒愚衷收回成命俾臣得安心供職勉效馳驅
庶撫分循涯免憂隕越渥荷

高厚鴻施感且不朽謹懃誠籲請伏乞

皇太后

皇上聖鑒訓示施行謹

奏

同治七年七月十五日

同治七年七月二十二日內閣奉

上諭前因捻逆蕩平施恩在事諸臣賞加左宗棠太子
太保銜並交部照一等軍功議敘茲據左宗棠奏稱追
剿無功難以忝竊請收回成命覽其情詞甚爲懇摯惟
國家論功行賞自有常經該大臣其他効馳驅用副委

任母許固辭欽此

覆陳善後事宜摺

奏爲覆陳善後事宜仰祈

聖鑒事竊臣於七月初七日連鎮行營欽奉

寄諭英翰奏善後章程各條並請撤皖軍各摺片所奏
不爲無見其請撤直隸練軍留勇扼紮一節都興阿左
宗棠李鴻章官文俱久歷戎行目覩畿輔情形崇厚在
津年久亦深知其得失卽著該大臣會商良策以昭核
實西征事宜前因崇厚陳奏曾諭該大臣等於軍務完
竣擇其願留軍營者挑選入關除劉松山郭寶昌所部

兩軍應山左宗棠統帶回陝接辦回務外其各營勇丁著李鴻章左宗棠酌量情形奏聞候旨派往皖省應留重兵並免其查究前案自係權宜辦理李鴻章籍隸皖省都興阿亦久在江南情形自必熟悉並著會商覆奏欽此竊維直隸創練六軍原爲建威銷萌之計迨去冬今春梟匪捻逆兩次擾犯練軍不能制於是朱學勸有請裁撤練軍之奏英翰有另選淮皖豫大枝勁旅一萬八千人分駐東西南三路之奏一在節虛糜一在求實效其主撤練軍則一也誠以直隸新練戰事罕經與其

徒有虛名無裨實用曷若仍還舊制可節餉需而現在
捻逆旣平亟謀遣撤與其散之四方漫無統紀曷若萃
其精銳拱衛

畿郊

臣愚竊謂

練兵可撤而直隸武備究不宜荒今擬

概行裁撤無論額兵情願意決更難望其振作有加且
恐因缺望而偶語紛呶難於禁約此練軍未宜盡撤之
實情也遠軍入衛近

畿雖與唐代府兵之意略同然彼用制兵此用募勇制
兵多有身家募勇半無根著客軍與土著雜處難保耕

市無驚且一萬八千人分爲三路每路各設一統將無論用非其才難資鈴束亦恐彼此未能和協貽誤機宜至勇丁至一萬八千人統攝固非易事總統並顧三路稽察亦慮難周大凡總統之才旣須廉勇明幹威愛素孚尤必其部曲中人才稍多乃供分布臣於淮皖豫諸將領雖未能徧觀盡識然就所聞所見言之實亦未敢輕相許與此客軍未宜久駐直隸之實情也方今制兵之不足用由於餉薄而兵不能精亦由營伍習氣已深驟難更革承平無事之時制兵徒供差遣干把外額按

缺遞升副參各員專講應酬何知戰陳一旦令當前敵所用非其所習縱令壯健過人而閱歷未深難免倉皇失措又管轄太多兵至百名以上千把外額占去數名又各占役操兵數名守其舊規牢不可破是雖有練兵之名究難觀練兵之效也臣觀劉長佑練軍章程條理精密所演陳圖亦極合式就中惟營中文員多由上司差派練營呼應不靈月餉徑令赴部請領又餘下一項有名無實數者均宜更正裁撤而總統分統文武翼長須斟酌去留未經戰陣之參游都守千把外額尤應撤

退歸伍按照勇營營官什長百長之例均選久於戰陣
屢經保擢者充之庶幾營伍習氣得以蠲除未經戰陣
之兵丁得久經戰陣之勇目節制訓練倡其勇敢之氣
亦將爭自濯磨日有起色矣至練軍未經更定之先各
軍概經撤遣直隸須得勁軍爲緝捕梟匪游勇之用本
任提督劉銘傳戰功久著在淮軍中紀律頗嚴應否
飭下該提督精選六七千人駐紮保定河間之中暫資
鎮壓責成該提督將練軍歸其整理俟練軍有效卽將
該軍陸續裁撤似於直隸練軍一事必有實濟而兵民

暫時相處實可無扞格之虞官文都興阿曾有緘來商
權亦頗以盡撤練軍爲疑臣此次覆奏未及會銜合併
聲明伏乞

皇太后

皇上聖鑒訓示施行謹

奏同治七年七月二十日

軍機大臣奉

旨著交神機營王大臣俟各該大臣督撫等覆奏到時
一併妥議具奏欽此

料理西征並遵

旨陛見摺

奏爲遵

旨料理西征一俟就緒卽先由水路北行

陛見仰祈

聖鑒事竊七月十三日連鎮營次欽奉

寄諭昨據李鴻章馳奏查明逆首投水確情餘匪淨盡
直東一律肅清請循例陛見等情當經諭令該大臣將
在營兵勇移撤後再行來京陛見惟現在陝甘等省軍
務緊要急須左宗棠統帶所部劉松山郭寶昌喜昌等

軍回剿左宗棠卽飭令劉松山等軍一面拔營由山西
渡河入陝將廊延綏榆等處回氛節節掃蕩左宗棠著
先行來京陛見陝省回氛紛擾股數繁多除劉松山等
軍外各營將弁如有忠勇奮發願西往從征者並著李
鴻章左宗棠英翰曉諭各營聽候遴選歸左宗棠節制
郭寶昌傷病計已全愈如尙未能銷假卽著郭運昌帶
領該總兵舊部先行西進前據崇厚英翰所陳善後各
條並著李鴻章左宗棠妥速議奏欽此跪讀之餘敬悉
聖慈軫念西陲速期底定至意比經恭錄行知劉松山

郭運昌喜昌欽遵辦理十八日據劉松山郭運昌等稟稱初十日劉松山派隊一由東北一由正北郭運昌全福率隊由德平商河傍黃河出濱州利津一帶搜捕約均於海濱會齊十六日鹽山及小山一路隊伍回甯津十七日商河武定一路隊伍回甯津沿途積潦縱橫秫粟深茂各處新成圩寨鉦鼓相聞鄉團引導徧搜並無蹤跡其派出之順營總兵楊世俊記名副都統全福由樂陵出海豐亦可次第撤回居民驚疑頓釋劉松山等由甯津拔回連鎮東南臣現編審降人妥爲鈴束催調

天津存餉散給各營以作行糧一俟稍有頭緒卽分起
西還臣卽先行入覲

天顏額請

訓示大約旬日以外卽可成行惟保定河間一帶秋水
甚漲官道漫溢馬步難行運河兩岸決口未塞車馬時
虞阻滯擬輜重由運河顧舟運赴河南彰德隊伍由景
州西行赴彰德臣先由水路駛赴天津赴
都入

覲將來卽由保定南下至彰德乃趨衛懷渡河西向所

以不復取道山西者緣徑道險仄大隊難行而劉松山郭寶昌所部將士久從征役紛紛乞假過河後尙須從新整理乃可入陝也

諭旨除劉松山等軍外各營將弁如有忠勇奮發願西往從征者並著李鴻章左宗棠英翰曉諭各營聽候遴選歸左宗棠節制臣維陝甘之事籌餉難於籌兵籌糧難於籌餉臣籌轉運尤難於籌糧臣在陝時已曾約畧陳明矣從前勝保多隆阿入秦楊岳斌度隴皆務徵調兵勇爲迅速驅除之計卒至兵多餉絀回患未平而潰軍

叛卒之禍起譬猶貧人無隔宿之糧而張筵召客強作
豪舉有不噎其謬者乎論者謂兩淮之人强悍健鬪用
之秦隴可以挫回逆之兇鋒銷淮皖之隱患於計誠爲
兩得臣又以爲不然江淮之民尙氣任俠古昔已然非
生而嗜亂也巨逆如張樂行苗沛霖亦非果具梟雄之
資素蓄不軌之謀也始奇其詐力而獎進之繼悟其愚
弄而牢籠之終恨其桀黠遂圖舉其類而盡殄之譬猶
癰疽初發不用內托外消之方其後乃爲剜肉之計也
淮皖諸軍皆新立功其將領皆富貴矣若擇其樸勇而

稍明紀律者分統之以資鎮壓又擇廉惠稍知方略之
守令拊循而化誨之不出數年積習當可一變不此之
務乃思移淮皖之隱患於秦隴乎隱患在

畿郊驅而遠之可也所謂移腹心之疾置諸股肱也隱
患在淮皖如圖驅之秦隴是移股肱之疾於股肱不可
也論者又謂淮皖以軍入秦隴必仍由淮皖給餉臣乃
過爲之慮無乃太愚不知淮軍之餉千人每月約銀六
千左右雖與楚軍相等然近時每年止發九箇月之餉
計算每勇每月不過三兩有奇此狙公賦茅之說也士

卒之驕逸而難禁制其弊由此皖軍則每勇每月不過二兩四錢糧食由官給領亦不過三兩有奇豫軍亦然若至秦隴則糧價昂貴較之各省奚啻倍蓰若不籌津貼固無以齊其力而服其心若竟籌津貼此項餉銀又將安出臣於張曜宋慶程文炳歸統時曾請行首功之賞計張曜宋慶兩軍賞過銀一萬餘兩程文炳一軍賞過銀三千餘兩此暫時之計耳若處糧價昂貴之地歷窮年累月之久勢何能支迨日久無功而或生他變而罪臣不善拊循不善駕馭臣固無辭然將如秦隴何哉

臣不得不早爲之計也現在各省將領營求入陝者多
未必卽爲忠勇奮發無須招之使來各省挑軍入陝之
舉必將有之未必容臣挑選臣擬俟回陝後將陝甘餉
事悉心考究度可養勇若干再擇營哨各官赴安徽河
西開募以符楚軍舊例此時誠未敢草率從事致貽後
悔謹因

聖明垂詢而仰陳之伏乞

皇太后

皇上聖鑒訓示謹

奏 同治七年七月二十日

軍機大臣 字寄同治七年七月二十三日奉

上諭左宗棠奏遵覆善後事宜並料理西征各摺片李鴻章奏辦理善後並陸續撤勇籌辦降眾各摺片覽奏均悉淮皖等軍現既無願往陝境自請投効之人左宗棠亦稱其於西征情形不便且淮軍月餉數目與各營優絀亦殊諸多未便該大臣擬就現有兵力辦理陝省軍務如需續行添兵卽擬在皖豫等省另行招募著照所議辦理直隸所屬地方李鴻章既稱南勇與民情恐

不相習且久役思歸著卽照所議將劉銘傳郭松林等
軍陸續裁撤分駐徐州濟甯周家口等處速行籌補欠
餉俟補足後卽行裁撤歸籍英翰所部皖軍前據該撫
奏稱擬挑留一萬二千名分爲四枝選派將領扼紮要
地鎮守曾經諭令李鴻章等會商茲據李鴻章覆奏與
該撫意見相同著英翰卽將遣將選兵並分駐何處妥
籌布置李鴻章所陳駕馭降眾事宜本日已明降諭旨
飭令兩江安徽各督撫妥辦矣蒙亳一帶民風素稱強
悍將來散遣降眾歸籍錯處尤易滋生事端英翰當慎

選賢能牧令妥爲整頓李鴻章請令皖撫常駐潁壽一
帶就近督察按制所陳不爲無見著英翰妥議具奏搶
股投降賊目及兇惡反覆並籍隸蒙亳從逆多年之匪
業經李鴻章派員正法其餘脅從降眾均著收回軍械
分別遣留妥爲安插所請撫輯慶豐等處難民並彈壓
土匪一節本日已諭令官文崇厚辦理並諭令丁寶楨
於武定一帶一律照辦李鴻章另片奏請將傅振邦獎
勵等語本日已明降諭旨將傅振邦照請獎敘並令其
來京陛見矣將此由五百里諭令知之欽此

奏劉松山剿賊出力並曾國藩知人之明片

再劉松山本湖南已故道員

賜諡壯武王鑫舊部臣十餘年前卽知之而未之奇也

嗣由湖南從征入皖爲曾國藩所賞拔雖論功按階平

進而屬望有加臣嘗私論曾國藩素稱知人晚得劉松

山尤徵卓識劉松山由皖豫轉戰各省曾國藩嘗足其

軍食以相待解餉至一百數十萬兩之多俾其一心辦

賊無憂缺乏用能保垂危之秦救不支之晉速衛

畿甸以步當馬爲天下先卽此次巨股蕩平平心而言

何嘗非劉松山之力臣以此服曾國藩知人之明謀
國之忠實非臣所能及特自各省言之不能不目之爲
秦軍以各軍言之不能不目之爲臣部臣無其實而居
其名撫衷多愧合無仰懇

天恩將曾國藩之能任劉松山其心主於以人事

君其效歸於大裨時局詳明宣示以爲疆臣有用人之
責者勸伏候

聖鑒訓示施行謹

奏
同治七年七月二十日

恭謝

天恩摺

奏爲恭謝

天恩仰祈

聖鑒事同治七年七月二十四日内閣奉

上諭前因捻逆蕩平施恩在事諸臣賞加左宗棠太子
太保銜並交部照一等軍功議敘茲據左宗棠奏稱追
勦無功難以忝竊請收回成命覽其情詞甚爲懇摯惟
國家論功行賞自有常經該大臣其勉效馳驅用副委
任毋許固辭欽此跪誦之下感悚難名伏念臣忝總師

干未嫺韜略仗

皇威之震疊幸奏膚公藉羣策之匡持克殲殘寇寸勞未效內顧滋慙迺蒙

丹詔特頒

優加甄敘更得青宮備列

寵冠班聯臣何人斯膺茲

曠典惟有懷遵

聖諭益勵秉忱圖補救於方來俾拯火熱水深之患效馳驅而恐後用體

宵衣旰食之心所有微臣感激下忱理合繕摺恭謝
天恩伏乞

皇太后

皇上聖鑒謹

奏
同治七年七月二十九日

分別撤留吉林黑龍江兵勇摺

奏爲撤留吉林黑龍江兵勇仰祈

聖鑒事竊臣軍上年北行原帶馬隊兵勇共有兩起一爲喜昌新練之馬隊一爲全福安住舊有之馬隊嗣於春壽歸臣總統時臣以山東撫臣咨送之春山莫爾賚額兩起隸之而以訥蘇肯一起併歸喜昌以當前敵茲當凱旋在即馬隊各將領均以出征有年願得暫歸休息臣維古昔之勞還役還卒也莫不念其勞而恤其私卽室家之故飲食之微凡將卒所不敢直陳者無不曲

爲體念代爲抒寫此佚道使民民忘其勞之義也吉林
黑龍江馬隊自軍興以來轉戰十數年戎馬關山未遑
啓處茲幸直東肅清距家非遠若復強之西征似無以
慰其懷歸之意且其中實有久役疲勞傷病增劇必須
撤歸調養者臣令喜昌詳加察驗將應准撤之官兵丁
勇八百六十九員名交頭品頂戴題奏副都統新補吉
林鑲紅協領富珠哩帶回吉林旗籍富珠哩蓋已出征
十有八年矣全福所帶之黑龍江官兵一百三十二員
名吉林頭二起官兵四百餘員名均交全福帶回旗籍

內挑留官兵二百七十一員名准回旗休息數月後仍
由全福帶赴陝西隨同征剿并令全福於原籍伊通河
挑選民勇三百名歸併成營一同帶赴陝西以資得力
其增募之民勇應需買馬製備號衣及官兵赴陝盤川
共發過銀一萬八千六百兩交全福具領來時無須沿
途應付此籌畫撤回旗籍之官兵丁勇及准假增募赴
陝之官兵丁勇也其挑留願隨西征官兵丁勇七百八
十一員名分爲三營委佐領哈豐阿吉勒杭阿德明爲
營總其缺額一百二十餘名卽由哈豐阿等就地挑選

民勇補之同臣軍統領馬軍之擬保提督浙江處州總兵馬德順一併前赴陝西聽候調遣所有分別撤留吉林黑龍江官兵丁勇數目除咨兵部吉林將軍黑龍江將軍外謹具摺陳明伏乞

皇太后

皇上聖鑒訓示施行謹

奏

同治七年七月二十九日

軍機大臣奏

旨均著照所議辦理惟增募民勇是否可用仍著該大

臣隨時體察倘實在不能得力卽行撤回斷不可意存遷就致誤戎機欽此

恪請奏稿續編卷十五目錄

福建採米航海濟軍懇恩獎敘摺

遵旨覆陳廣籌方畧摺

請指撥陝甘實餉摺

各省釐金請移作西征軍餉片

籌備晉防請催果司赴任片

請增撥巨款以利戎機摺

遵旨覆陳摺

派員緝緝游勇片

請停皖捐分局片

福建採米航海濟軍懇

恩獎敘摺

奏爲福建籌貲採購大米十萬石航海濟軍於軍務大有裨益謹據實陳明籲懇天

天恩獎敘尤爲出力之員以昭激勸事竊用兵之要軍食爲先直隸自上年旱潦頻仍民間蓋藏空虛糧價翔貴而官軍追賊所歷均曾被蹂躪之區州縣屬城枯坐視城外客軍往來絡繹乞糴無從閉目不理村戶集鎮人民早已逃匿一空僅留老廢守瞭向其告糴百無一應其併村結寨諸處當兵賊難分時見有人馬經過動

輒執仗鳴鉦堅拒不納每當追剿緊急時糧盡食之致
誤師期兵勇因買糧入村滋生事端互相詬病甚或激
成仇恨彼此各有藉口直東一帶兵民鬬隙之深大半
由茲而起署閩浙督臣英桂總理船政前江西撫臣沈
葆楨籌措巨款採購大米十萬石航海濟軍然後諸軍
無飢乏之虞得以一意進剿賊須掠食而行猶有停待
官軍則轉饋相繼得免稽延南人食稻腸胃相宜疾病
罕生筋力亦健以故盛暑行師日與剽悍劇賊角逐於
炎威震鑠之中而損折尙少用能迅赴戎機剋期掃滅

是則英桂沈葆楨公忠士誼臣等及諸將士宜同深感仰者也此議發於前護福建巡撫署福建藩司延建邵道周開錫及福建前署藩司卽補道夏獻綸嗣後周開錫由閩赴滬料理採運一切夏獻綸赴天津驗收均屬著有微勞應請

旨將周開錫交部從優議敘夏獻綸到津後兼轉臣軍上海購存軍裝洋火藥並在津製備軍裝該員從前隨臣江皖浙閩軍營辦理營務疊著勞績於臣軍營制素所諳悉此次航海來津辦理轉運贊畫機宜尤資裨益

可否仍以福建道員儘先題奏之處出自

天恩伏乞

皇太后

皇上聖鑒訓示施行謹

奏同治七年八月初一日

同治七年八月初六日內閣奉

上諭左宗棠奏請將購米濟軍之員獎勵等語道員周開錫著交部從優議敘夏獻綸著仍以福建道員儘先題奏欽此

遵

旨覆陳廣籌方畧摺

奏爲遵

旨覆陳仰祈

聖鑒事竊臣於七月二十四日連鎮行營八月初五日

天津途次兩奉

寄諭敬悉金順奏稱土回各匪股數甚多蔓延設米並有髮逆袁姓大股竄至綏德

諭令廣籌方畧妥爲兼顧鄭敦謹奏請調得力官兵赴榆林進剿

諭令酌度情形夾擊兼顧仰見西陲兵事方殷至煩
聖慮竊維陝西所患回土各匪出沒靡常臣上年入關
維時擒逆披猖未遑悉力搜剿嗣蒙

特簡劉典署理撫篆陝西軍務日有起色稍紓

朝廷西顧之憂金順所陳髮逆袁姓大股竄至綏德似
卽指雲巖踞逆髮捻袁大魁而言此股已經劉典派道
員魏光燾提督劉端冕及提督劉厚基所部會剿犁巢
搗穴一鼓殲除惟首逆及隨身死黨數十漏逸未獲諒
茲敗殘小醜暫無能爲葭米一帶竄匪多由花馬池定

邊一帶竄來陝之北鄙與甘肅接壤各處山谷盤互素爲土匪藏匿之所其頭目以董福祥扈彰爲最著前據各路稟董福祥扈彰均已就撫劉典函中亦畧及之惟慮人數眾多安插不易未能日久帖然榆林綏德距西安千里而遙距花馬池定邊一帶亦近千里山程荒遠郵傳濶稀無事時文牘往還已虞沈滯亂後音書寥寂傳聞互異固在意中金順拜摺時尙未知雲巖剿辦竣事故未免總總過慮耳至鄭敦謹請調得力官兵赴榆林進剿意在以入秦進剿之師爲山西防邊之用事期

兼濟局勢攸宜現在凱旋各軍因河開大名一帶積滯縱橫自東徂西官道多遭漫溢人馬難行臣未拔營之前屢次遣人探視回報皆同故擬由景州取道鉅鹿任縣一帶以向彰德衛輝俟臣入覲後南旋會隊然後渡師孟津返旆西嚮其未能取道并陘諸徑由晉入秦亦實由前途被水淹阻車馱絕跡致然不僅太行之險爲可憚也

諭旨飭臣酌度情形抽派得力將弁由河保一帶渡河西向榆林節節進剿以扼賊匪東竄臣擬俟行抵懷慶

後再察陝邊兵情賊勢以定行止至劉松山所部因從
征旣久疲病過多前此回湘召募勇丁二千北來更補
現已由鄂抵豫該軍渡河後必須在洛陽一帶暫駐從
新訓練一律完整乃可率以西趨郭運昌一軍過河後
各將士有須給假更換者入關之期亦未能速卽臣之
親軍各營入關後亦必須逐加整理始可卽戎未可加
以迫促也山西防務旣以北路爲重自應早爲籌備綢
繆於未雨之先綏遠城將軍大同鎮總兵責有專屬兵
力原不爲單旣不過河助剿以剿爲防亦宜憑河設防

萬防於剿豈宜遠恃鄰省剿賊官軍爲固圍之計果如
鄭敦謹所奏由晉渡河扼守榆林相機進剿從此秦賊
不復東窺晉防亦臻鞏固豈非臣之至願特晉防自歸
化隴托清等處由西北折而南由南折而東一千六七
百里惟恃河流一綫扼賊東趨秦軍剿賊轉戰而前勢
難停車久駐河岸而回土各匪勢既蔓延北山一帶路
徑紛雜臣軍雖節節掃蕩而西保無漏逸餘匪乘虛東
犯苟晉防稍有罅漏終難免金堤蟻穴之虞上年綏德
方復而逆賊忽從西南疾趨乘水東竄爲大局憂迫本

年三月山西增募之湘軍遵調前來已無及矣事後追思悔恨何益合無仰懇

天恩飭下山西撫

臣

綏遠城將軍預將轄境防務早爲

籌畫自薩托清以訖垣曲水陸交嚴期無滲漏如須調兵募勇卽於水橋未成之先上緊布置勿如前此諉謝因循再蹈覆轍是所至幸

臣

雖愚昧亦頗知大局爲重

凡心力所可盡者斷不稍分畛域自重愆尤區區愚忱

冀邀

鑒察謹一併據實覆陳伏乞

皇太后

皇上聖鑒訓示施示謹

奏 同治七年八月初一日

軍機大臣 字寄同治七年八月十二日奉

上諭左宗棠奏遵籌布置情形一摺晉防自歸化薩托清等處由北而南一千六七百里秦軍進剿勢難久駐河岸回土各匪勢既蔓延北山一帶路徑紛雜難保無漏逸餘匪乘虛東犯左宗棠所奏亦係實在情形所有晉省北路防務鄭敦謹當會商定安桂成悉心籌畫河

保以南沿河各邑防堵該署撫亦應督飭帶兵各員弁
嚴密布置如須調兵募勇務於冰橋未成之先趕緊籌
辦毋得專恃鄰軍援剿坐失機宜晉省防務秦師固難
專任而於一切布置機宜左宗棠仍當全局統籌力扼
賊匪勿使東竄如有大股賊匪逼近晉邊仍應迅撥兵
勇入晉會剿以保完區該大臣無論從何路入陝總以
兵由東進逼賊西趨最爲要著秦回日肆披猖亟須添
派勁旅協同剿洗劉松山郭運昌等營卽著左宗棠檄
令趕緊訓練俾迅速成軍剋期西進掃蕩逆氛將此諭

知左宗棠並由五百里諭令鄭敦謹定安桂成知之欽
此

請指撥陝甘實餉摺

奏爲陝甘餉源奇絀請

旨飭下軍機大臣會同戶部籌議指撥實餉以奠危疆
仰祈

聖鑒事竊陝甘籌餉之艱天下共知其所以異於諸省
者地方荒瘠物產非饒一也舟楫不通懋遷不便二也
各省雖遭捻逆髮逆之害然或旋擾旋復或腴區被擾
瘠地猶得苟全或衝途被擾僻鄉猶能自固陝甘回漢
錯處互相仇殺六七年並無甯宇新疇已廢舊藏旋空

搜掠既頻避移無所三也變亂以來漢回人民死亡大半牲畜掠食鮮存種藝既乏壯丁耕墾並少牛馬生穀無資利源遂塞四也兵勇餉數各省雖贏縮不同然日食所需尙易點綴以粮價平減購致非難故也陝甘則食物翔貴數倍他方兵勇日啖細糧二斤卽需銀一錢有奇卽按日給予實銀一飽之外並無存留鹽菜衣履復將安出五也各省地丁錢糧之外均有牙釐雜稅捐輸各項勉供挹注陝西釐稅每年尙可得十萬兩內外甘省則併此無之捐輸則兩省均難籌辦軍興旣久公

私交困六也各省轉運雖極繁重然陸有車馱水有舟楫又有民夫足供顧運陝甘則山徑犖确沙磧荒遠所恃以轉饋者惟馱與夫馱則騾馬難供夫則顧覓不出且糧糗尅料事事艱難勞費倍常七也用兵之道剿撫兼施撫之爲難尤甚於剿剿者戰勝之後別無籌畫撫則受降之後更費綢繆各省受降惟籌給資遣散令其各歸原籍而已陝甘則蠻由內作漢回皆是土著散遣無歸非籌安插之地給牲畜籽種不可其未及安插之先非酌籌口食之資不可用費浩繁難以數計八也陝

甘用兵頗多爲時又久亂後荒瘠殊常購糧不易各軍
每於人煙稠密種植稍多地方隨宜安紮營壘始猶藉
稱保護莊稼給錢辦糧繼則捐派民間不給價值甚且
擄掠殆盡民不敢爭以致轉徙流離變而爲匪或被逆
回誘養苟且偷生甘爲從教之人黨惡助逆章奏中所
稱甘省飢民土匪大率此類居多若不及早核實汰存
予以資餉俾其有所藉口則軍令有所不行垂盡之殘
黎靡有孑遺未荒之土地盡成榛莽而西陲之事不可
復問矣臣之立意仿漢趙充國議開屯以省轉饋撫輯

無業災民且防且剿且戰且耕不專恃軍威爲戡定之計者區區之思蓋以辦回逆與剿羣寇不同陝甘事勢與各省情形各別將欲奠此一方永弭後患則固不敢急旦夕之效而忘遠大之規也通計陝西每年缺餉一百五六十萬兩甘肅每年缺餉二百餘萬兩而屯田之資撫輯之費不與焉茲幸捻逆蕩平海內兵事漸息餉事亦藉資周轉合無仰懇

天恩飭下軍機大臣會同戶部酌議籌撥陝甘的餉俾微臣得從容整理以奠危疆則陝甘軍民共戴

皇仁於無窮而臣亦得仰賴

鴻施稍寬咎責矣其劉松山一軍餉需向由兩江接濟

曾國藩於此軍始終加意保全并無延誤臣前已附片

陳明未蒙

宣示茲馬新貽調督兩江應併懇

聖慈飭下該督臣照常協撥俾得有所展布不勝欽感

之至所有陝甘餉源奇絀請

飭會籌指撥寔餉情形謹據寔陳明伏乞

皇太后

皇上聖鑒訓示施行謹

奏

同治七年八月十六

各省釐金請移作西征軍餉片

再臣軍入陝餉需必須隨時接濟而近來各省協餉未能如期撥解縱使函牘交催多以空言搪塞陝甘距東南各省較遠轉運維艱卽各省協濟有欸報解之後亦非數月不能到陝往往停軍待餉致誤機宜且於上年兩次奏請借撥洋餉由各該藩司解還各海關歸欸誠以借欸由各省歸還於欸目並無出入而臣軍得此巨

欵即可預先籌畫立濟要需現在軍初蕩平東南各省
餉事足敷周轉雖釐金一項曾奉

諭旨量爲裁減酌留大宗統計爲數尙鉅似可移作西
征軍餉臣軍除前奉部撥各餉外此次江蘇江西湖北
四川等省復有請

旨加撥之餉應如何按月提撥妥爲經理抑仍准臣援
照上年成案酌借洋欵由釐金項下歸還俾臣西行無
顧慮之處伏乞

飭部一併會同速爲議覆施行無任感激待

命之至謹附片具陳伏乞

聖鑒施行謹

奏 同治七年八月十六日

籌備晉防請催臬司赴任片

再臣欽奉七年八月十二日

上諭晉省北路防務鄭敦謹當會商定安桂成悉力籌畫河保迤南沿河各邑防堵該署撫亦應督飭帶兵各員并嚴密布置加須調兵募勇務於冰橋未成之先趕緊籌辦毋得專恃鄰軍援剿坐失機宜晉省防務秦師

固難專任而於一切布置機宜左宗棠仍當全局統籌力扼賊匪勿使東竄等因欽此昨承

召見復承

聖諭諄諄以晉防爲念跪聆之下仰見

宸謨廣運至爲周詳臣敢不竭盡心力之所能爲以冀

稍酬

高厚查晉防自薩托清等處由北而南一千六七百里每當冰橋合成之際無險可扼深爲可虞現蒙

飭山西撫臣鄭敦謹等預籌布置鄭敦謹等似應一面

另籌調兵一面先儘現有兵力賜爲設防惟就臣見聞
所及晉省將領得力者頗覺乏人已革山西臬司陳湜
雖係獲咎之員然於兵事尙有閱歷現已交卸臬司篆
務調度恐有難靈應由山西撫臣發給該革員統帶關
防責令仍辦防務暫資統攝如能奮勉出力再行量請
恩施新授山西臬司蔣益澧并請

飭催迅速赴任該員從征有年勞績卓著應行選募勇
丁若干請

諭令該臬司自行酌度辦理所需餉項卽由湖南湖北

督撫臣先爲墊給以利師行可否令其督辦山西防務
專摺奏事俾免牽制之處出自

逾格鴻慈謹附片具

奏伏乞

聖鑒謹

奏同治七年八月十六日

軍機大臣字寄同治七年八月十八日奉

上諭左宗棠奏籌備晉防請催臬司赴任等語晉省西
北兩路防務緊要自應於冰橋未成之先豫籌堵遏方

免臨時張皇左宗棠請令鄭敦謹一面另籌調兵募勇
一面先儘現有兵力嚴爲設防卽著該署撫懷遵疊次
諭旨實力嚴防如另有可調之兵暨添募勇丁之處並
著趕緊籌畫以期有備無患已革臬司陳湜因病乞假
旋省已諭令仍赴防所惟旣交卸臬司篆務深恐調度
不靈反致誤事著鄭敦謹刊就木質關防發交該革員
開用責令督率各員嚴密防堵以資統攝新任臬司蔣
益澧屢催赴任迄未成行晉省防務喫緊何得托故遷
延著劉崑傳知蔣益澧迅卽馳赴本任應行選募勇丁

若干卽由該臬司自行酌度辦理所須餉項著郭相蔭
劉崑何璟先爲墊給以利進行蔣益澧到任接辦防務
後所有在防文武兵勇概歸節制調遣如有粉飾疏忽
抗玩軍令者卽由蔣益澧稟知鄭敦謹從嚴參奏其一
切應辦事宜並著蔣益澧隨時與鄭敦謹妥商籌辦以
副委任左宗棠本有節制節省軍務之責一切布置機
宜仍著該大臣妥籌兼顧毋得稍分畛域貽誤事機湖
北湖南各營保奏記名提鎮人員其中如有曉暢戎機
長於訓練能定心定力整頓營務者著郭柏蔭劉崑悉

心察訪出具切寔考語隨時奏聞候旨錄用將此諭知
左宗棠並由五百里諭知鄭敦謹郭柏蔭劉崑並傳諭
何璟知之欽此

請增撥巨款以利戎機摺

奏爲餉項苦絀懇

恩增撥巨款以利戎機而奠危局仰祈

聖鑒事竊陝甘變亂已久軍威不振其原由於餉源奇絀無以養軍致士氣日頹無以制賊迫爲時旣久賊勢仍張復議廣募客軍以求速戰之效於是兵數日增而餉事日絀非僅不能制賊且更以增賊今之士匪哥老匪游勇潰勇則皆無餉之軍不能制賊反以增賊之明驗也餉足則將能馭軍而軍不敢犯兵能衛民而民不

受擾不足則反是聖人論政以足食爲先如不得已則以去兵爲急事理昭然豈必今異於古陝甘餉源之細人皆知之陝西每年缺餉一百四十餘萬兩甘肅每年缺餉三百餘萬兩均經署撫臣劉典署督臣穆圖善陳奏臣前疏請撥定餉謂陝西每年缺餉一百五六十萬兩蓋並臣親軍各營合計不僅一百四十餘萬兩也謂甘肅每年缺餉二百餘萬兩蓋除歸併陝西供支之甘軍而言謂約止二百餘萬兩也合兩省計之缺餉總在四百餘萬兩從前髮逆捻逆未平天下之患在東南財

賦之鄉中原腹心之地勢固難以全注之西北一隅疆
臣坐視淪胥不敢爲過望之請計臣但期敷衍無以應
如願之求往復空文徒成畫餅茲幸捻氛淨掃海宇蕩
平各省解嚴與民休息計清釐積欠酌留兵勇爲費雖
尙不貲而節出之餉需贏餘之釐金洋稅總不下千餘
萬兩用東南之財賦贍西北之甲兵各省勢本有餘而
陝甘則得半斯足此可爲陝甘常年經費請者也
諭旨允軍機大臣戶部之請撥各海關六成洋稅項下
銀一百萬兩爲臣西征戡餉由臣酌撥甘肅自本年十

二月起按月協解爲數本不爲少惟臣親軍各營五千
餘外新開馬隊九營挑留吉林馬隊三起此外劉松山
新增步隊三營馬隊一營郭運昌新增馬隊一營又全
福增募吉林民勇馬隊三百皆踰於常額計日授食每
月卽需八九萬兩何有贏餘分撥甘肅且此項旣自十
二月起算各海關縱如數如期協解水陸程途逾數千
里非俟明年春夏之交頭批不能抵陝此數月閒懸軍
待餉遇有調發何以應之或者陝餉尙有存餘堪資挹
注則挪彼應此事猶可爲而途次接閱劉典抄摺咨會

知洋款業經用盡林壽圖詳稱司庫一空如洗穆圖善
方索分洋款咄咄逼人卽欲稍事通融憑何著手而尤
可惜者秦中兵事經劉典調度大有轉機諸將士盡力
殫誠著有成績觀回逆之分議移巢土匪之款營乞撫
可見其震懾兵威茲復聞臣弭節西旋軍容甚盛其恟
懼是在意中如果糧餉充裕因其恟懼攻之事半功倍
留奏諸將領緘牘頻來亦均有急擊勿失之請臣謂臣
方挈重兵鉅餉還秦剿撫兼籌事無不克而不知臣方
垂橐入關兵力雖屬有餘餉事無從取給也無論籌剿

則必更行糧儲芻粟設轉運籌撫則必籌安插給口食
散籽種非有寬餘款項應手不能隨時舉辦卽令按兵
坐食一無所事又能枵腹忍飢遠待數千里外隔年之
協餉以舉火哉合無仰懇

天恩飭兩江督臣江蘇撫臣湖廣督臣湖北撫臣兩廣

督臣廣東撫臣粵海關監督各海關六成洋稅各照軍

機大臣戶部原撥之數共計一百萬兩提前協解務於

今臘明正到陝以應急需如各海關一時未能湊集如

數卽援照成案仍由各督撫臣出備印票交臣上海轉

運局福建道員胡光墉領收轉向洋商借取現銀解陝
以期捷速仍由各督撫臣按期撥還歸款其息銀先於
借款內劃扣統由臣報銷計此項提前數月到陝臣可
將亟應辦理各事及時籌辦不致坐失事機而於各海
關款目仍無出入其此項未到之前遇有緊急機宜陝
西無款可籌并懇

天恩飭下山西撫臣於河東鹽課項下無論京協各款
提撥二十萬兩迅速解陝庶期就近有款接濟掣肘無
虞臣得一意經營別無顧慮陝西大局之幸也至陝甘

全局之安危不爭一時兵事之利鈍緣地方彫弊異常
又頭緒紛繁刻難就理一面用兵卽須一面籌辦善後
庶幾一了百了後必無災診疾雖在延醫處方必須購
藥藥品足備攻達乃神治重病則藥不得輕治久病則
功難求速應仍懇

天恩飭下軍機大臣會同戶部妥籌陝甘常年寔餉自
明年伊始事定而止每歲於各海關洋稅各省釐金項
下劃提銀四百萬兩分給陝甘酌時勢之緩急定協
餉之多寡臣當奉在事諸臣盡心力之所能到者電勉

圖維與西事相終始期挈全境還之

朝廷斷不敢或作或輟虛負

恩知亦不致以餘粟餘財自汙素節區區愚悃冀荷

鑒原所有兵情賊勢及分支洋款細數應俟抵西安後
會同劉典據寔馳報合併聲明伏乞

皇太后

皇上聖鑒訓示施行謹

奏
同治七年九月二十四日

軍機大臣奉

旨軍機大臣會同戶部速議具奏

遵

旨覆陳摺

奏爲遵

旨覆陳事竊臣於九月十二日湯陰縣宜溝行次欽奉
九月初十日

寄諭給事中陳廷經奏西陲未靖宜及時抽調會勦屯
墾招安敬陳管見一摺現在直東等省雖已肅清而粵
捻各股降眾在各軍中尙不下三兩萬人各省凱撤兵
勇爲數亦多陝甘軍務方殷左宗棠所帶之兵不過三
萬該給事中以東皖等省或酌留萬餘人或數千人坐

耗糧餉不如驅使勦賊請留養精銳以杜亂萌分路進
兵防勦互用及時興屯兼備安撫所陳不爲無見陝甘
防勦事宜是左宗棠專責李鴻章勦賊有年於東南將
士性情知之最悉該大臣等均屬國家重臣當此邊陲
未靖自應急籌長策以收底定之功著卽就該給事中
所奏各條彼此緘商務須屏除成見通籌全局迅速奏
聞以資採擇欽此跪聆之下敬仰我

皇上眷念西陲急急籌底定至意竊維陝甘不靖山西所
恃以爲固者黃河自塞上迤東折而南流足以陷戎馬

之足耳兵從秦出由東而西晉防尤宜布置謹嚴毫無罅漏然後秦軍進剿無前突後竭之虞晉防復嚴得形格勢禁之道庶幾屏蔽寬而關鍵利大局固而異患銷是故欲重黃河之險固宜合秦晉以通籌而欲一秦晉之心又宜分防剿而并任也按山西河防自河曲保德以南夾岸山谷迤邐有險可據前據陳湜緘稱已一律修砌壘卡設險增防似西河一帶尙可無虞近奉

諭旨飭豫軍分防中路並以大支徑駐榆林接李鶴年緘稱已遵調張曜宋慶各增募數營赴防是北路亦期

嚴固惟綏遠歸化地界極邊薩托清等處黃流淺漫地勢平行間該處兵力殊不足恃定安來緘亦以此爲慮此固秦晉所難代謀者也陝回被勦窮蹙鋌走草地亦在意中似宜預事防維早爲之所臣前於

陛辭後接晤李鴻章論及西事亦深知秦隴餉事太絀不能用衆而旋有簡選銳卒相助之說三品銜候補翰林院侍講學士袁保恒曾爲臣言伊故父袁甲三舊部併隸李鴻章中多可用者意欲於淮軍中選募成軍自當一路臣甚壯之該員現在都寓可否

飭下袁保恒令其赴淮選募成軍刻期入晉徑駐歸化城作爲游剿之師相機截擊於大局實有裨益所有該軍餉需自應由李鴻章寬爲籌備李鴻章如赴新任應爲酌定的餉源源籌解方無掣肘之虞併請

飭下李鴻章妥爲籌畫山西塞外有此一軍局勢庶臻嚴密如蒙

俞允則金順一軍俟宋慶到榆林後應仍回駐定邊花馬池聯絡銀條梁甯夏一帶以扼草地之衝秦之北路隴之東北晉之西北均可相庇以安矣至袁保恒已蒙

恩擢至翰林學士例得奏事如蒙

簡派所有該處軍務應否令其會同定安具摺馳報以期徑捷之處出自

聖裁所有遵

旨覆陳原由謹據實馳

奏伏乞

皇太后

皇上聖鑒訓示施行謹

奏
同治七年九月二十四日

派員緝游勇片

再 臣 於前月十九日

陛辭後二十六日啟行南下九月初八日行抵河南彰德府入親軍營會師西向時因各軍製備寒衣未齊駐候四日十二日始克拔行十八日馳抵懷慶府孟縣分起渡河因河南辦工運料船隻調赴下游渡船稀少臣軍馬步二萬四千有奇戰馬車馱頭日數已逾萬按日以次渡河閒值西北頂風尤難順速計尙須兩三日全軍始克畢渡由直隸拔營以來沿途皆支帳安鍋兵勇

野處不入城市採購一切均照民間時價軍民相安惟
入豫境以後時有游勇冒充官兵於師行前後數十里
閒公行剽劫卽告假弁勇亦時遭其害緣地方當四達
之衢各省革勇游勇及散遣之勇易於會聚爲害商旅
已派員躡緝并飭附近地方官隨時查拏懲處直隸河
南秋稼豐稔民氣恬熙尙堪仰慰

慈廕謹附片陳明伏乞

聖鑒謹

奏 同治七年九月二十四日

軍機大臣 字寄同治七年九月二十九日奉

上諭左宗棠奏籌防歸綏派員躡緝游勇吳坤修奏請
派大員督辦省防長江皖南各釐請歸還安徽會辦
隄事宜各摺片覽奏均悉綏遠歸化地界極邊薩托清
等處黃流淺漫防務極關緊要著左宗棠會商定安等
嚴密防維妥爲布置該大臣請飭袁保恒選募淮軍徑
駐歸化並令會同定安奏事之處均毋庸議陝甘匪勢
蔓延左宗棠當統率各營迅速殄除醜類豫省游勇冒
充官軍於師行前後數十里間公行剽劫弁勇亦遭其

害左宗棠雖已派員搜捕李鶴年當隨時督飭地方官
是力嚴拏按律懲辦皖境游匪乘機搶掠去省數里刼
案迭出哥老案匪到處皆有尤慮互相勾結吳坤修現
駐壽州未能兼顧所有省城防務著卽責成裕祿認真
辦理遇有匪徒滋擾盡法懲治以靖地方山東至清淮
一帶亦有游勇混迹搶掠行旅著張之萬丁寶楨飭屬
嚴拏務獲究辦吳坤修所稱皖餉之絀現聞淮軍議撤
請以長江皖南釐金除每年撥歸水師三十二萬兩外
其餘概歸安徽等語卽著曾國藩馬新貽丁日昌吳坤

修會商辦理豫省決開隋隄借道放水皖境宿州及靈
泗等處必罹重災民命攸關不可不慎益加慎著曾國
藩馬新貽張之萬蘇廷魁李鶴年吳坤修悉心籌商妥
爲辦理毋得以鄰爲壑貽害民生將此由六百里諭知
曾國藩左宗棠馬新貽張之萬蘇廷魁丁日昌丁寶楨
李鶴年並傳諭吳坤修知之欽此

請停皖捐分局片

再臣據陝西捐餉總局詳稱陝甘餉源日涸亟盼捐款
接濟惟查皖捐章程輕減異常各捐生避重就輕以致

陝甘軍務毫無起色現在東南肅清皖省防軍漸次裁撤該省餉事料無庸藉助各省捐輸所有皖捐各省分局應請一律飭停俾陝甘捐務稍期應手等情前來臣覆查無異應請

旨飭部核議安撫所設各省捐局應否一律停止俾陝甘捐局不致盡成虛設謹附片具陳伏乞

聖鑒訓示施行謹

奏

同治七年九月二十日奉

軍機大臣奉

旨戶部議奏欽此